



2019-5

15. november 2019

Nal. nr./j.nr.: 2019-323-0077

All. nr./brevnr.: 64776

Sull./sagsbeh.: FH/jh

Pineqartoq: Oqartussaassut-  
simik ilusilersuineq, oqartus-  
saasumut qulliinerusumut  
naammagittaalliorsinnaaneq

**Naammagittaalliummik Aningaasaqarnermut Naalakkersuisoqarfimmut ingerlatitseqqilluni nassiussineq oqartussaasutsimik ilusilersuineq erseqqissaqqullugu Naalakkersuisut Siulittaasuata Naalakkersuisoqarfianut siunnersuuteqarnisamat pissutissaqalersitsivoq**

*Peqqissutsimik Pinaveersaartitsinermillu Aqutsisoqarfimmi sulisoq Aningaasaqarnermik Sulisoqarnermillu Aqutsisoqarfiup soraarsippaa. Sulisup soraarsitsineq Ombudsmandimut tamatuma kingornatigut naammagittaalliuutigaa.*

*Aningaasaqarnermik Sulisoqarnermillu Aqutsisoqarfiup aalajangiinera Naalakkersuisoqarfimmut naammagittaalliuutigineqarsinnaanersoq Ombudsmandip naammagittaalliuut tunngavigalugu Aningaasaqarnermut Naalakkersuisoqarfimmut apeqqutigaa.*

*Aningaasaqarnermut Naalakkersuisoqarfiup Ombudsmandi ilaatigut akivaa Aningaasaqarnermik Sulisoqarnermillu Aqutsisoqarfik tassaasoq aqutsinermi allaffissornikkut oqartussaasoq nammineertoq, naammagittaalliuullu Naalakkersuisoqarfimmut naammagittaalliuutigineqarsinnaasoq.*

*Naammagittaalliuut Ombudsmandip Aningaasaqarnermut Naalakkersuisoqarfimmut ingerlateqqillugu nassiuppaa. Ingerlatsiviup innuttaasullu aaqqiagiinngissutaasa Ombudsmandip suliami akuliutsinneqannginnerani illua'tungeriinnit aaqqinniarneqaqqartaariaqarnerat Ombudsmandip ilaatigut innersuussutigaa.*

*Aningaasaqarnermik Sulisoqarnermillu Aqutsisoqarfik Aningaasaqarnermut Naalakkersuisoqarfimmit oqaatigineqartutut aqutsinermi allaffissor-nikkut oqartussaasutut nammineertuunersoq Ombudsmandip tamatumunnga atatillugu isummerfiginngilaa.*

*Ombudsmandip paasinneqqaarnera unaavoq nalunaarummi § 3, imm. 1-imi oqaaseqatigiit siulliit – Naalakkersuisut allaffeqarfimmit ingerlatsivimmit immikkoortutut aaqqissuussaasumit ikiuuffigineqarnissaannik oqaatiginnittut – Aningaasaqarnermut Naalakkersuisoqarfiup aamma Aningaasaqarnermik Sulisoqarnermillu Aqutsisoqarfiup oqartussaasup taannaasup ilaatut isigineqartariaqarnerat ikorfartoraat. Illua'tungaanili Ombudsmandip paasinneqqaarnera unaavoq oqartussaassutsip ilusilersugaaneranik ti-tartaganngortitap ilusilerneqarnerata oqartussaasut assigiinngitsut mar-luk pineqarnerat ikorfartoraa.*

*Ombudsmandip Naalakkersuisut Siulittaasuata Naalakkersuisoqarfia su-liamik tamanna tunngavigalugu ilisimatippaa. Oqartussaassutsimik ilusi-lersuineq erseqqissaqqullugu Ombudsmandip Naalakkersuisut Siulittaasuata Naalakkersuisoqarfianut siunnersuutigaa.*

*Aningaasaqarnermik Sulisoqarnermillu Aqutsisoqarfik pillugu naammagittaalliummik suliarinninnini Ombudsmandip unitsippaa, Naalakkersuisullu Siulittaasuata Naalakkersuisoqarfia qinnuigalugu Ombudsmandip siunnersuutaa qanoq iliuuseqarnissamut pissutissaqalersitsinersoq paasissutis-siissutigeqqullugu.*

*(Oqaaseqaat 15. november 2019-imeersoq, j.nr. 2019-323-0077)*

Ombudsmandip Aningaasaqarnermut Naalakkersuisoqarfimmut inaarutaasumik allagai allakkani pineqartup kinaassusia ilisarnarunnaarsillugu tulliuuttuni issuarneqarput:

## **A-p Aningaasaqarnermik Sulisoqarnermillu Aqutsisoqarfik pillugu naammagittaalliuutaa**

A Peqqissutsimik Pinaveersaartitsinermillu Aqutsisoqarfimmi tjenestemanditut atorfimmit soraarsinneqassasoq Aningaasaqarnermik Sulisoqarnermillu Aqutsisoqarfik allakkatigut 15. januar 2019-imeersutigut aalajangiivoq.

A uannut allakkatigut 3. juni 2019-imeersutigut ilanngussartalitsigut naammagittaalliorpoq.

Aningaasaqarnermut Naalackersuisoqarfik naammagittaalliuut tunngavigalugu allakkatigut 9. juli 2019-imeersutigut aperaara Naalackersuisoqarfiup paasinninnera unaanersoq Aningaasaqarnermik Sulisoqarnermillu Aqutsisoqarfiup aalajangiinera Naalackersuisoqarfimmut naammagittaalliuutigineqarsinnaasoq.

Aningaasaqarnermut Naalackersuisoqarfiup allakkatigut 28. oktober 2019-imeersutigut akivaanga. [...] Naalackersuisoqarfik ilaatigut allappoq Aningaasaqarnermik Sulisoqarnermillu Aqutsisoqarfiup aalajangiinera Naalackersuisoqarfimmut naammagittaalliuutigineqarsinnaasoq.

Aningaasaqarnermut Naalackersuisoqarfiup oqaaseqaataa tunngavigalugu aalajangerpunga A-p naammagittaalliuutaa Naalackersuisoqarfimmut ingerlateqqillugu nassiunnarlugu, naammagittaalliuunni Naalackersuisoqarfiup suliarissagaa A-p qinnutigisaatut. A-p naammagittaalliuutaanut atatillugu massakut annertunerusumik iliuuseqaqqissanngilanga.

Taamatut aalajangernerera tulliuttuni sukumiinerusumik tunngavilersorpara.

### **1. Misissuinerma tunuliaqutaa**

**1.1.** Pissutsit ingerlatsinermi oqartussaasumut qulliunerusumut naammagittaalliuutigineqarsinnaasut pillugit naammagittaalliuut aqutsinermi allaffisornikkut oqartussaasumit qullerpaamit aalajangiiffigineqareersimatinnagit

Ombudsmandimut suliasanngortinneqarsinnaanngillat. Tamanna Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi (matuma kingornatigut Ombudsmandi pillugu inatsimmik taaneqartartussami) § 13-ikkut aalajangersarneqarpoq.

Naammagittaalliornissamut periarfissaq taamaattoq inatsisikkut aalajangersarneqarsimasinnaavoq imaluunniit oqartussaasumut qulliunerusumut naammagittaalliuuteqarsinnaanermik tunngaviup nalinginnaasup nassatari-sinnaallugu.

Oqartussaasup alliunerusup aalajangiinerisa oqartussaasumut qulliunerusumut aallaavittut naammagittaalliuutigineqarsinnaanerat inatsiseqartitsinermit tunngaviup taassuma nassatarigaa nalinginnaasumik ilimagineqarpoq.

Ilaatigut Niels Fengerip allallu atuakkiaanni Forvaltningsret-imi 2018-imeersumi kapitali 22, pingaartumillu quppernerit 1015 tullialu aamma Karsten Revsbechip allallu atuakkiaanni Forvaltningsret – Almindelige emner-mi arfinilissaanik 2016-imi naqitertinneqartumi kapitali 5, pingaartumillu qupperneq 304 innersuussutigaakka.

Taamaattumik aqutsinermit allaffissornikkut qullersariaanermi/allersariaanermi oqartussaasup alliunerusup aalajangiineri pillugit naammagittaalliuutit aallaavittut suliarisinnaasussaangilakka.

Kalaallit Nunaanni qitiusumik aqutsisoqarfiup aaqqissuunneqarnera 2008-imi allanngortinneqarmalli suliani arlalinni oqartussaassutsip ilusiligaanerata uanga pisinnaatitaaninnut sunniutaa pillugu apeqqutip samminissaanut periarfissaqartarsimavunga.

2008-mi ukiumoortumik nalunaarutigaa ilaatigut innersuussutigaara (kalaallisuani quppernerit 14 tulliiilu qallunaatuuanilu quppernerit 12 tulliiilu).

Suliami 2012-imi ukiumoortumik nalunaarutinni immikkoortumi 5.3-tut ilanngunneqartumi ilaatigut oqaatigaara Akileraartarnermik Aqutsisoqarfiup aa-

lajangiinera Aningaasaqarnermut Naalakkersuisoqarfimmut oqartussaasutut qulliunerusutut naammagittaalliorfissamut naammagittaalliutigineqarsinnaasoq. Taamaattumik taamani Ombudsmandi pillugu inatsimmi (Inatsisartut Ombudsmandiat pillugu Inatsisartut inatsisaanni nr. 8-mi, 3. december 2009-meersumi) § 13 innersuussutigalugu isumaqarpunga naammagittaalliut suliarisinnaangikkiga. Suliamut tassunga malitseqartitsineq 2016-imi ukiumoortumik nalunaarutinni immikkoortumi 1.3-mi eqqartorneqarpoq.

Taakkua saniatigut ilaatigut Anders Jørgensenip allaaserisaa "Kalaallit Nunaanni qitiusumik aqutsisoqarfimmi ingerlatsinermi oqartussaasut ilusiligaa-nerat" 2011-imi ukiumoortumik nalunaarutinni immikkoortumi 3.2-mi ilanngunneqartoq innersuussutigaaara.

**1.2.** Naalakkersuisut suleriaasiat pillugu Namminersorlutik Oqartussat nalunaarutaat nr. 18, 9. november 2017-imeersoq (matuma kingornatigut nalunaarummik taaneqartartussaq) 10. november 2017-imi atuutilerpoq. Nalunaarummi § 3, imm. 1-imi oqaaseqatigiitsigut siullertigut aalajangersarneqarpoq Naalakkersuisut allaffeqarfimmit immikkoortutut aaqqissugaasumit ikiuuffigineqassasut.

Ombudsmandi aamma Naalakkersuisut Siulittaasuata Naalakkersuisoqarfia tamatuma kingornatigut allaffigeqatigiittarput, Ombudsmandillu nalunaarut pillugu apeqqutai arlallit Naalakkersuisut Siulittaasuata Naalakkersuisoqarfiaata allakkatigut 2. marts 2018-imeersutigut aamma 1. juni 2018-imeersutigut akivai.

Naalakkersuisut Siulittaasuata Naalakkersuisoqarfianut allakkani 11. juli 2018-imeersuni Naalakkersuisoqarfimmut nassiunneqarnerannut peqatigitillugu assilinera Inatsisartut Inatsisinut Ataatsimiititaliaannut nassiunneqartumi ilaatigut makku oqaatigaakka:

"Oqaatigaarattaaq nalunaarummi § 3, imm.1-imi aalajangersaanertut ataatsimut ingerlatsivittut aaqqissuunneqartussatut ingerlanneqarpat, paasinnittaasera mallillugu immikkoortortaqaarfiit siusinnerusukkut oqartussaaffittut quleriikkaatut i-

nissisimareersut ataasiakkaat aalajangiinerat oqartussaasunut qulliunerusunut suliassangortinneqarsinnaanera periarfissaajunnaassammat.

Tamassuma malitsigissavaa aqutsisoqarfinni taamatut inissisimasuni aalajangiinerit ingerlaannartumik Inatsisartut Ombudsmandianut naammagittaalliuutiginegalersinnaassammata, tassami qulliunerusunut oqartussaasunut ingerlatsisinnaaneq inatsiseqartitsinermi paasinnittaatsimi nalinginnaasumi atuukkunnaassammat. Ombudsmandi pillugu inatsimmi § 13 innersuussutigaa, [...].”

Ombudsmandip 2017-imi ukiumoortumik nalunaarutaata Inatsisartunit tuusatissatut tiguneqarnissaanik Inatsisartut aalajangiiffigisassaattut siunnersuutip siullermeerneqarnerani atugassatut akissuteqaat Naalackersuisut Siulittaasuata 1. november 2018-imi saqqummiuppaa.

Akissuteqaammit ilaatigut erserpoq oqartussaassutsip ilusiligaanerata titartagangortinneqarnera (matuma kingornatigut titartagangortitamik taaneqartartussaq) Naalackersuisut nittartakkamikkut tamanut saqqummiussimagaat. Aammattaaq oqaatigineqarpoq Naalackersuisoqarfiit ataanni immikkoortut Naalackersuisoqarfiup ilaatut imaluunniit Naalackersuisoqarfik pineqartoq eqqarsaatigalugu qullersariaanermi/allersariaanermi immikkoortutut nammineertutut isigineqarnerisut titartagangortitap takutikkaa.

Titartagangortitami ilaatigut takuneqarsinnaapput Kalaallit Nunaanni Aqutsisoqarfiit, matumani Aningaasaqarnermik Sulisoqarnermillu Aqutsisoqarfik ilanngullugu eqqarsaatigalugu, ”Naalackersuisoqarfiup Naalackersuisulluunniit ataanni immikkoortutut nammineertutut” taaneqarsimasut.

**1.3.** Titartagangortitap allaffeqarfik immikkoortutut aaqqissuunneqassasoq nalunaarummi aalajangersakkamut qanoq ililluni naapertuuttuuneranik oqaloqatiginnissuteqarneq Naalackersuisut Siulittaasuata Naalackersuisoqarfianut tamanna tunngavigalugu aallartippara.

Pisut ingerlanerat Kim Blok bop allaaserisaani ”Qitiusumik allaffeqarfissuarmi oqartussaassutsimik ilusilersuineq”-mi 2018-imi ukiumoortumik nalunaarutinni immikkoortumi 2.4-mi eqqartorneqarpoq.

Naalakkersuisut Siulittaasuata Naalakkersuisoqarfiata oqaloqatigiinnermut tassunga uiggiullugu e-mailikkut 22. februar 2019-imeersukkut oqaatigaa nalunaarutip tullianik allanngortinneqarnerani Naalakkersuisut "qitiusumik allaffeqarfissuarmi oqartussaassutsimik ilusiliineq tamanut saqqummiutissa-gaat" aalajangersakkamik § 3-mi ikkussisoqarnissaa siunnersuutigineqar-niartoq.

Naalakkersuisut Siulittaasuata Naalakkersuisoqarfianut allakkani 19. marts 2019-imeersuni Naalakkersuisoqarfimmut nassiunneqarnerannut peqatigitil-lugu assiliner Inatsisartut Inatsisinut Ataatsimiititaliaannut nassiunneqartu-mi ilaatigut makku oqaatigaakka:

"Inatsisissatut nalunaarutissatullu il.il. siunnersuutininut missingiutit pillugit uanga Ombudsmanditut oqaaseqaateqarajunngilanga. Oqartussaassutsimilli ilusilersui-neq – allakkanni 11. juli 2018-imeersuni qulaani taaneqartuni aamma ersertutut – innuttaasut Ombudsmandimut qaqugukkut naammagittaalliorsinnaanerannut toqqaannartumik sunniuteqarpoq.

Taamaattumik makku oqaatigerusuppakka:

Uanga paasinninnera unaavoq titartaganngorlugulu takussutissiaq oqartussaas-sutsip ilusilersorneqarneranik paasiuminarsaasoq suliniutaasoq pitsaasoq.

Naalakkersuisut Siulittaasuata Naalakkersuisoqarfia imatut paasivara aqutsine-rup ataatsimut ingerlatsivittut aaqqissuunneqarnissaanik aalajangersagaq aallaa-vittut isumaqartinneqartoq titartaganngorlugulu takussutissiap aqutsisoqarfiit immikkoortutut nammineertuusutut takutitsinera aallaavimmik taassuminnga sa-neqqutsinertut ilaatigut paasineqassasoq.

Tamanna eqqortumik paasinninneruppat siunnersuutigaara – pisariaqarneratut erseqqarissuutitsineq qulakkeerniarlugulu paatsuinerillu pinngitsoortinniarlugit – ataatsimut ingerlatsiviup aallaaviunera taassumalu saneqqunneqarsinnaanera nalunaarutip oqaasertaani erseqqissarneqassasoq.

Aammattaaq siunnersuutigaara titartaganngorlugu takussutissiaq taanna qara-saasiat atorlugit saqqummiisarnermut Namminersorlutik Oqartussat nalunaarutaat nr. 1, 2. januar 2014-imeersoq tunngavigalugu nalunaarutikkut tamanut saqqummiuttariaqarnersoq Naalakkersuisut Siulittaasuata Naalakkersuisoqarfiata isumaliutersuutigigaa.”

Ombudsmandip 2018-imi ukiumoortumik nalunaarutaata Inatsisartunit tu-saatissatut tiguneqarnissaanik Inatsisartut aalajangiiffigisassaattut siunnersuutip siullermeerneqarnerani atugassatut akissuteqaat Naalakkersuisut Siulittaasuata 11. november 2019-imi saqqummiuppa.

Akissuteqaat taanna oqartussaassutsimik ilusilersuinerup titartaganngortinneqarnera pillugu paasissutissanik akissuteqaammi 1. november 2018-imi saqqummiunneqartumi paasissutissat assinginik imaqarpoq.

Akissuteqaalli nalunaarutip allannngortinneqarnissaa pillugu paasissutissanik imaqanngilaq, nalunaarullu allakkat ukua allanneqarneranni allannngortinneqarsimanani.

Titartaganngortitaq suli [www.naalakkersuisut.gl](http://www.naalakkersuisut.gl)-imiippoq, nittartakkalli ilaani ([inatsisit.gl](http://inatsisit.gl)-imi) tamanut saqqummiussinerni nalinginnaasumik atornerqartartumiinnani, titartaganngortitallo ulloq tamanut saqqummiunneqarfia allanneqarsimanani.

## **2. Suliap matuma ingerlasimanera naatsumik**

A Peqqissutsimik Pinaveersaartitsinermillu Aqutsisoqarfimmi tjestemanditut atorfimmit soraarsinneqassasoq Aningaasaqarnermik Sulisoqarnermillu Aqutsisoqarfik allakkatigut 15. januar 2019-imeersutigut aalajangiivoq.

A uannut allakkatigut 3. juni 2019-imeersutigut ilanngussartalitsigut naam-magittaalliorpoq.



Aningaasaqarnermut Naalakkersuisoqarfik naammagittaalliuut tunngavigalugu allakkatigut 9. juli 2019-imeersutigut aperaara Naalakkersuisoqarfiup paasinninnera unaanersoq Aningaasaqarnermik Sulisoqarnermillu Aqutsisoqarfiup aalajangiinera Naalakkersuisoqarfimmut naammagittaalliuutigineqarsinnaasoq.

Aningaasaqarnermut Naalakkersuisoqarfik qinnuigaara oqaaseqaat Naalakkersuisut Siulittaasuata Naalakkersuisoqarfia aqutigalugu nassiuteqqullugu, taamaalilluni Naalakkersuisut Siulittaasuata Naalakkersuisoqarfia Aningaasaqarnermut Naalakkersuisoqarfiup isumaanik isummerfiginninnissaminut periarfissaqarsinnaaqqullugu. Naalakkersuisut Siulittaasuata Naalakkersuisoqarfia aammattaaq qinnuigaara ataatsimut akissut Aningaasaqarnermut Naalakkersuisoqarfiup aamma Naalakkersuisut Siulittaasuata Naalakkersuisoqarfiata oqaaseqaataanut ilanngullugu uannut nassiuteqqullugu.

Aningaasaqarnermut Naalakkersuisoqarfiup allakkatigut 28. oktober 2019-imeersutigut ilaatigut imatut akivaanga:

“Aningasaqarnermik Sulisoqarnermillu Aqutsisoqarfik Naalakkersuisoqarfiup aataani allaffissornikkut nammineq aalajangiisinnaassuseqartutut isigineqarsinnaamat aammalu Namminersorlutik Oqartussat sulisoqarnikkut akisussaaffeqarneq oqartussaaffeqarnerlu kiisalu Aningaasaqarnermik Sulisoqarnermillu Aqutsisoqarfik sulisoqarnikkut tunngasutigut aalajangiisussatut isumaginnittuummat aalajangigaq pillugu Naalakkersuisoqarfimmut naammagittaalliorqarsinnaasoq Aningaasaqarnermut Naalakkersuisoqarfik isumaqarpoq.

Saaffiginnissut tunngavigalugu A-mit naammagittaalliuut Naalakkersuisoqarfimmit suliarineqassaaq.”

Allakkat taakku Naalakkersuisut Siulittaasuata Naalakkersuisoqarfianit nasiiunneqarsimasutut isikkoqanngillat. Taamaattumik sulisuma ilaat Aningaasaqarnermut Naalakkersuisoqarfimmut 31. oktober 2019-imi sianerpoq, apequtigalugulu Naalakkersuisut Siulittaasuata Naalakkersuisoqarfia akissutip suliarineqarnerani peqataasimanersoq. Aningaasaqarnermut Naalakkersuisoqarfiup oqaatigaa allakkat 28. oktober 2019-imeersut Naalakkersuisut

Siulittaasuata Naalackersuisoqarfianik oqaloqatiginninneq tunngavigalugu suliarineqarsimasut.

### **3. Uanga naliliinera**

**3.1.** Imatut paasivara Aningaasaqarnermut Naalackersuisoqarfiup paasininnera unaasoq Naalackersuisoqarfik aamma Aningaasaqarnermik Sulisoqarnermillu Aqutsisoqarfik tassaasut oqartussaasut assigiinngitsut marluk, taamaattumillu Aningaasaqarnermik Sulisoqarnermillu Aqutsisoqarfiup suliami matumani aalajangiinera Naalackersuisoqarfimmut naammagittaalliuutigineqarsinnaasoq.

**3.2.** Pissutsit ingerlatsinermi oqartussaasumut allamut naammagittaalliuutigineqarsinnaasut pillugit naammagittaalliuutit aqutsinermi allaffissornikkut oqartussaasumit qullerpaamit aalajangiiffigineqareersimatinnagit Ombudsmandimut suliassangortinneqarsinnaanngillat. Tamanna qulaani oqaatigineqartutut Ombudsmandi pillugu inatsimmi § 13-ikkut aalajangersarneqarpoq. Aalajangersagaq taanna tunngaviumik isummamut matumunnga takussutissaavoq, tassalu ingerlatsiviup innuttaasullu aaqqiagiinngissutaat uanga Ombudsmanditut suliami akuliutsinneqannginninni illua'tungeriinnit aaqqinniarneqaqqaaartariaqartut.

Pisuni allani arlalinni – naak oqartussaasumut qulliunerusumut naammagittaalliornissamut periarfissaqanngikkaluartoq – sukumiinerusumik misissuinermik isuma taanna aallaavigalugu aallartitsisarnaviangilanga. Taamaalluni oqartussaasup suliaq suliareqqilerniarpagu oqartussaasorluunniit naammagittaalliummik isummerfiginninnissaminut periarfissaqarsimanngippat naammagittaalliuutitut suliamik suliarinninnera aalajangersimasumik periaaseqarninni unitsittassavara.

Ombudsmandi pillugu inatsimmi § 14, imm. 1 innersuussutigaa, tassuunalu aalajangersarneqarpoq naammagittaalliuut misissuinermik aallartitsinermut pissutigissallugu naammannersoq Ombudsmandip aalajangissagaa.

Imatut paasisariaqarpara A-p naammagittaalliuutaa Aningaasaqarnermut Naalackersuisoqarfiup suliariniaraa. Taamaattumik isumaqarpunga suliamik Aningaasaqarnermut Naalackersuisoqarfik isummerfiginninnissaminut periarfissaqareersimatinnagu uanga sukumiinerusumik misissuinissara pissu-sissamisoortuunaviangitsoq.

A-p allagai 3. juni 2019-imeersut ilanngussartaasalu assilineri tamanna tunngavigalugu ilanngullugit nassiuppakka. Paasissutissat taakku Aningaasaqarnermik Sulisoqarnermillu Aqutsisoqarfik pillugu naammagittaalliuunni Aningaasaqarnermut Naalackersuisoqarfiup suliarissagaa A-p qinnutigisaatut nassiuppakka.

A-mut ullumikkut allakkama assilinerat ilisimatitsissutitut ilanngullugu aammattaaq nassiuppara.

**3.3.** Eqqortussaq anguniarlugu oqaatigaara Naalackersuisoqarfik aamma Aningaasaqarnermik Sulisoqarnermillu Aqutsisoqarfik oqartussaasut assigiingitsut marluunerannik Aningaasaqarnermut Naalackersuisoqarfiup paasininnera isumaqatigineriga matumani isummerfiginngikkiga. Oqartussaasumut qulliinerusumut naammagittaalliortarnermik aqqissuussineq uanga suliamik Ombudsmandi pillugu inatsimmi § 13 tunngavigalugu suliarinninnissannik mattussisoq pineqarnersoq aamma isummerfiginngilara.

Uanga paasinneqqaarnera unaavoq nalunaarummi § 3, imm. 1-imi oqaaseqatigiit siulliit – Naalackersuisut allaffeqarfimmit ingerlatsivimmit immikkoortutut aqqissuussaasumit ikiuuffigineqarnissaannik oqaatiginnittut – Aningaasaqarnermut Naalackersuisoqarfiup aamma Aningaasaqarnermik Sulisoqarnermillu Aqutsisoqarfiup oqartussaasup taannaasup ilaatut isigineqartariaqarnerat ikorfartoraat. Uangali paasinneqqaarnera unaavoq titartaganngortitap ilusilerneqarnerata oqartussaasut assigiingitsut marluk pineqarnerat ikorfartoraat.

Apeqqut taanna sukumiinerusumik misissorniarnagu aalajangerpunga. Taamatut aalajangerninnut manna ilaatigut pissutaavoq, tassalu uanga paasin-

neqqaarnera unaasoq misissuinerup taamaattup A inatsiseqartitsinikkut pitsaanerusumik inissisimalersissinnaasussaangikkaa. Naalakkersuisut Siulittaasuata Naalakkersuisoqarfiata nalunaarutip allanngortinneqarnissaa suli siunertarigaa paasisariaqarakku taamatut aalajangerninnut aamma pissutaavoq. Naalakkersuisoqarfiup e-mailia 22. februar 2019-imeersoq qulaani immikkoortumi 1.3-mi eqqaaneqartoq innersuussutigaara.

Naalakkersuisut Siulittaasuata Naalakkersuisoqarfianut allakkat ullumi nassiuppakka, taakkulu allakkat ukua assilineranik ilaqartinneqarput. Naalakkersuisut Siulittaasuata Naalakkersuisoqarfianut allakkanni Naalakkersuisoqarfimmut malugeqqullugu oqaatigaara uanga paasinninnera suli unaasoq Naalakkersuisoqarfiup siunnersuutit uanga allakkannit 19. marts 2019-imeersunit ersertut isumaliutersuutigisariaqarai.

Naalakkersuisut Siulittaasuata Naalakkersuisoqarfia qinnuigaara allakkakka qanoq iliuuseqarnissamut pissutissaqalersitsinersut uannut ilisimatitsissutigeqqullugu.

#### **4. Naggasiutaasumik oqaaseqaatit**

Allakkat ukua assilineri Naalakkersuisut Siulittaasuata Naalakkersuisoqarfianut aamma A-mut nassiuppakka. Allakkat ukua assilinerat allakkanni pineqartup kinaassusia ilisarnarunnaarlugu Inatsisartut Inatsisinut Ataatsimiititaliaannut nassiuppara.

Oqaaseqaat manna oqaaseqaammi pineqartut ilisarnarunnaarlugit nittartakkanni tamanut saqqummiunneqarumaarpoq, 2019-imilu ukiumoortumik nalunaarutinni eqqaaneqarumaarluni.

A-p naammagittaalliuutaanut atatillugu massakkut annertunerusumik iliuuseqaqqissanngilanga.